


PORAIANI KI-TAP I



Acc. No. 8712
Class No. Book No.
Author
Title Ponaene Kitep I

DISTRICT LIBRARY
EAST GARO HILLS DISTRICT
WILLIAM NAGAR

Accession No. _____

1. Books may be retained for a period not exceeding *fifteen days* by members.
2. Books may be renewed on request at the discretion of the Librarian.
3. Dog-earing the pages of a book, marking or writing therein with ink or pencil, tearing or taking out its pages or otherwise damaging it will constitute an injury to a book.
4. *Any such injury to a book is a serious offence; Unless the borrower points out the injury at the time of borrowing the book he shall be required to replace the book or pay its price.*

Help to keep the book fresh and clean

PORAIANI KI·TAP SA

GARO READER I

TURA BOOK ROOM
TURA - 794001 WEST GARO HILLS

S B
COPYRIGHT

Reprinted 1957
Revised edition 1958
Reprinted 1962
Reprinted 1994

87/2
11 4 96
Dura

PRINTED IN INDIA
AT NABAPRESS PVT LTD, CALCUTTA 700 006


PORAIANI KI'TAP SA

Lesson 1

Bi'sani Mangsonga

1. Anga bi'sa chonenga,
Ka'sanisan ong'enga,
Ka'onangako angan,
Jakkalrongjawa pangnan.
2. Namgipamu nangrimgen,
'Tol'gipako mitchigen;
Miknenggipa bi'sako
Rorinja anga uko.
3. Ma'na pa'na ka'sagen,
U'mangko manironggen.
Bi'saskan' manengoba,
Inchakjawa ukoba.
4. Ang' jong aro norangko,
Ka'sae dilgen u'mangko,
Gipin ripengrangnaba,
Ka'sagen u'mangnaba.

Lesson 2



Jegrika

Changsao mande sakgni 'Ua matchu bima angnisa' ine jegrike salsekgrikna a'bachengaha. Indiba uamangni indake, saksa grongo aro sakgipin ki'meo rim'e, salsekgrikmitingon, sakgipin mandesa ua matchu himani sokko sepe ra'angtokaha.

Manderangni gisepo jegrikaniara uandaken bon'kamronga. Uni gimin an'ching jegrikna nangja.

Lesson 3




Singho aro Matchok

Changsao okkrigipa singho mangsa tusibeeng-gipa mangsa sapauko nikaha. Aro ua uko chagope rim'nasiengachim. Ua uochachan dal'begipa katpakangenggipa mangsa matchokko nike ua sapauko dongalemung matchokko rikangskaha. Singhoni rikangani gam'ako knae sapau mikrake-mung gipinchina katangaha. Singho matchokko sal gimik neng'bee rikangahaoba srapjajok. Uni gimin ua neng'a aro okkria amjae, gisiktango indine chanchiaha, 'Anga angni dongalbagimin sapaukon cha'e rosranggen.' Singho sapauni tusiram biapona pil'baaha. Indiba re'bae nion sapauko nikejajok, maina uan katangsoahachim.

Manderang basakobade an'tangtangni jako man'giminko chonnika; aro uamang an'tangtangni man'gijana mikboke uko man'na joton ka'ronga; aro indaken an'tangtangni man'giminkon basakobade gimaatsranga. An'ching an'tangtangni jako man'giminko chu'ongnikna aro dal'nikna nanga.


Lesson 4



Do'drang

Pilak do'oni ku'sik apsan ong'ja. Badiaba badiaba do'oni ku'sik ro'a, gitok ro'a, aro ja'teng ro'a. Indake maina ong'a? Badiaba badiaba do'o dipoo cha'ama. Uni gimin uarang ku'sik, gitok aro ja'teng ro'ako nanga. Do'gep aro do'nokni ja'a dingtanga. Do'gepni ja'a chio-jrona nama.

Lesson 5



Gorial

Ding'gipa a'songni chibimarango gorial bang'-
bea. An'chingni a'songoba Songdu chibimao
bang'a. Gorial sal ding'ao an'chenggo salbarama.
Ia noksao an'ching salbaramenggipa gorialko nika.
Ua ku'siktangko ku'ange chio napnasienga.
Mangqipinko rikna mangsongengakon. Basako-
bade gorialrang tom'dake an'chenggo salbarama.

Lesson 6



Gisik Grigipa Do'bok Manggni

Badiaba a'songni badiaba biapo chi ta'rake jokgipa aro chikol tu'gipa chiring dilsa gngang-chim. Ua chiringni apchongipa biap damsao chubegipa aro apchonbegipa jal'ang ge'sa gngang-chim. Ua jal'ang apchonani gimin uko malgiparang jatchio gronggrikode watpakgrikna man'jachim. Changsao gisik grigipa do'bok manggni nalsagrikoni ua jal'angko malbae uni jatchio gronggrikaha. Uarang gaora de'gipa aro bamgrikgijagipa ong'achim. Uni gimin manggnioni mangsaba an'pilna sikjaha. Indaken mangsara manggipinna an'tangko

onatna sikjae jegrike dakgrikaha aro uarang bakan tu'begipa chikolchi ga'akange sripe siaha.

Bi'sarang gaora de'gija aro jegrikgija saksa sakgipinna bamgrikna nanga.




Gisik Gnanggipa Do'bok Manggni

Changsao gisik gnanggipa do'bok manggniba gisik grigipa do'bok manggnini male dakgrike ga'ake sigipa apsan chubegipa aro apchonbegipa jal'angkon male jatchio gronggrikaha. Indiba uarang gisik grigipa do'bokrang gita mangsa manggipin baksa dakgrikgija bamgrikaha. Mangsa jal'ang kosako tugopaha, unon manggipin uni kosakkon malbate re'angchengaha.

An'ching pangnan saksa sakgipinna ka'sagrikna aro bamgrikna nanga.

Lesson 7



Indinari Jo'ongko So'otnabe

Rambang. Ua jo'ongko maina rim'a?

Tonang. Iako kal'e ja'mano so'ote galgen.

Rambang. Na'a jo'ongna, gu'knaba ka'sana u'ijabe; jo'ongko indake dakna nangama?

Tonang. O! maisa ong'ahade, minio Bananganba do'pinchepko rim'e grango bijichi jotprotaha.

Rambang. Cheche! Do'orang saknaako u'ipa-jama? Uaranga on'timintiba duk sukko u'ipajama?

Tonang. Uarang u'iengnaba donga.

Rambang. Ua jeba ong'chong, nang'ni jakko bijichi jotprotode ba nang'ni ja'ako pe'tongode na'ara sajawama?

Tonang. Aiao! namen sabegen.

Rambang. Indide jo'ongrangde sapajawama?

Tonang. Uaranga grapjake, miksa mikoai.

Rambang. Mikogen, oe da'nang! Nang'ni

saknaenba chrikmitingo chrikade chrikja, ring'asa ring'enga ine inode na'ara namnikgenma?

Tonang. Namnikjawa angade, ka'osa nangen.

Rambang. Indide nibo, biljak dongpagijagipa, ku'aganna changpagijagipa do'o aro jo'onrangko indake dakode uarangde duk man'jawama?

Tonang. Indakode da'al intaltal indinari mamungkoba kal'jabejok.

Lesson 8



Peru

Nibo maikai peru do'oko balangenga. Ua an'chingni jila do'o aro do'bokrangko nisigipa ong'a. Salo ua burungo donge cha'amtegipa do'bokko nikode, uko nachilo chikkape burungchina salange chike cha'ronga. Walode ua songona


re'bac do'noloni do'o aro do'geprangko chike balangronga. Pringwalo ba mikka badriode saloba ua nokni sepango burungo donge do'orangko tima. Unon uchipak do'orang cha'amna re'angmanode ua rang'san uarangko chagropemung chike balanga. Peruna agre bijare aro chunaba do'orangko nisironga.

Lesson 9

Badiaba badiaba a'songrango manderangna altue re'ani ma'manti cholrang donga. Indakgipa a'songrangni manderang jechi re'na nangoba neng'ngangian re'na man'a. Chel'a songchi re'na nangode, manderang motor gario, rel gario, jahato aro aeroplaneo gakate re'na man'a. Sepanggipa biaprangona re'na nangoba bang'a biaprangonan rel ramarang donga aro rel rama donggijagipa biaprangonara motor gario gakate re'na man'a. Indiba an'chingni songo indake re'ani cholrang bang'kuja.


Indake ong'ani gimin manderang bang'bata biaprangonan ja'achisan neng'bee re'na nanguenga. Uni gimin an'chingni a'songoba altuae re'na man'na gita namgipa ramarangko dakna joton ka'na nanga. An'chingni Assam a'songoba da'ode adita rel aro motor ramarang dongaha. Uni gimin

mitam biaprangode uarango gakate re'na man'aha. Songjinmarango motor gari, gufe gari aro mande-chi salgipa garirango jakkala. Indiba bang bata



Re'ani Ckolrang

biapragon manderang ja'achisan re'na nangeng-piti. Mitam biaprago matchu gario re'na man'a. Indiba uan gong'arakjabea, aro uno gakate re'oba suk ong'jani gimin mitam manderangde ja'achi re'ana bate neng'nikbata.

Lesson 10**Makrerang**

An'chingni a'songo makkrerang bang'bea. Makkreni jat bang'a. Uarang burung bolgrim-rango donga aro ma'manti bolni biterangko cha'e janggi tanga. Makkrerang a'bao ma'manti ge'a-rangkoba cha'e bon'ata. Uni gimin manderang uarangko namnikjabea, aro uarangko bang'a cholrangchin nisia. Basakobade nol kae bang'bea makkrerangko rim'gopa, aro uarangko den'e gala. Makkrerangni gisepo dal'gipa aro chongipa jat donga. Chongipa jatrangoni mitamde nina nitobea.

Lesson 11

Bol

Ian dal'begipa bol pangsa ong'a. Iani cheksi aro bijakrang bijimbea. Sal ding'mitingo bolni ja'pango ka'sinbea, aro rona nama. Bolrang a'aoni bitchiko salope dal'roroa. Mitam bolrang bilsi ru'utbee tanga. Bilsi hajal gittamna bateba ru'ute tanggipa bolrangba gnang. An'chingni a'songo bolrang bang'a, indiba badiaba badiaba a'song-rango bang'breja aro badiaba badiaba biaprango dongjasrang.




Bolrang an'chingna cholibea. Uarangchi an'-
ching nokrangko rika. Sigimin bolrangko an'ching
am'bolna jakkala.

Lesson 12

Ripeng Chong'mot

1. Ma'maanti bibalranga chibolranga bala,
Boksogimgim dake nina namen nitobea,
Bijarangba bilbaronga uarango dimna,
Kusi ong'e ma'dimemung bitchiko oppana.
2. Ong, ong, ong ine bildingdingmaesa,
Bilroroe kusi ong'a bitchiko opesa;
Nitogipa bibalrangni bala bon'ahaode,
Bilbajawa bijaranga uni ja'manode.
3. Uandake manderangni man'e cha'mitingo,
Pilak mande'n ripeng daka uamangko uno;
Indioba man'e cha'a jensalo bon'anggen,
Pilak mande'n janggilate u'mangko galchip-
gen.
4. Nammitingo samtangtangchi ripeng bang'-
beoba.
Dukni salrang sokbaode dongjawa pilakba;
Isol saksan ripeng chongmot, Uo ka'dong-
aibo,
Dukni sukni salrangoba Uosa pangchakbo.

Lesson 13



Alabok aro Na'tokrang

Alabok mangsa ru'uta sal intal saemung bilgria-ha. Ua na'tokrangko rim'e cha'na amjae chi rikamo sal sal gopjuju dake dongaiaha. Uni indake dongrongako nike salsao na'tokrang uko sing'aha, 'Nang'ko maina maiba saa gita ba mainaba duk ong'a gita pangnan nika?' Alabok aganaha, 'Angni dukara an'tangni giminde ong'ja, na'simangni giminsa. Maina ia na'simangni dongchak-enggipa chi tipchangpile sal rakchangnasienga. Unode na'simang pilakan sitoknasa nangaiginok. Indiba iani adita chel'ao namen dal'begipa aro tu'begipa wari damsa gnang. Na'simang da'onin

uanona kate dongsona man'ode jokgenchim. Indake na'simangni gimin chanchiesa angade duk man'enga.

Alabokni aganako knae na'tokrang namen jajrengbee alaboko sing'aha, 'Indide chingara maidakesa jokgen?' Alabok aganchakaha, 'Jokani mamung cholkode nikja, indiba na'simang namnikode anga na'simangko mangprakprak balange ua wario donena man'gen.' Alabokni aganako na'tokrang ra'chakaha. Indaken alabok salantin ua chiboloni na'tokrangko mangprakprak balange adita chel'kalgipa .bolo ma'bake cha'na a'bachengha, aro uan ka'sne ka'sne bilakrorobae an'sengaha.

Tol'pinappiparangna an'ching mikrakbena nanga.

Lesson 14

Man'e cha'gipa mande saksao depante sakgni gnangchim. Uamang'oni deokgite an'tang pagipani noko donge suk ong'ako chu'ongnikjaha. Uni gimin ua an'tangni man'gni gamko suale on'china pagipao bi'aha. Pagipa uni bi'a gita chacha dakaha. Unon ua an'tangni bakko ra'e song chel'achi re'angaha. Ua uano ma'manti namgijako dake ru'utgijan an'tangni gamko bon'ataha. Unon ua songo karap ong'na a'bachengaha. Ua mande

cha'asibaengaha. Uni ripengrangba uko galchip-tokaha. Unon ua mamung cholkoba nikjae mande saksao dongnapeaha, aro ua uko a'bachian'tang wakrangko nirikchina watataha. Ua pante a'bao mamungba cha'ani gri ong'e dongaiaha.



Branggipa Depante


Wakrangni cha'ani bikaprangchi an'tangko ok-kaatna am'oba ua man'jaha. Unon ua pante gisiktango chanchie aganaha, 'Apani noko gamnapgipa manderangan angna bate cha'aniko man'batenga, indiba anga iano okkrie sinasienga. Anga chakate angni pagipaona re'anggen aro anga una agangen, 'O apa, anga salgina, aro nang'ni nikao papko dakaha, nang'ni depante ine mingkuna anga kraja. Angko nang'ni gamnapgipa

nokkol saksa gita dakbo'. Unon ua chakate an'tang pagipaona re'baaha. Pagipa uko ru'uta sal intalan nikjaha. Da'o uni an'tangona mikkang bimang ong'sibee re'bapilengako niksooa ua una namen ka'sachakbeaha aro chel'ao niksoarion ua uona daariange uko gipake ku'dimenba noktangona rimbaaha. Pagipa an'tang depanteni re'bapilani gimin kusi ong'e, matchu bi'sa milgipako doke dal'a alaniko dakaha.

Lesson 15

An'chingni a'songo ma'manti chipurang gnan. Uarangni gisepo chipu nokmaan dal'bata. Indiba dal'batoba uan kenbegnide ong'ja; maina ua mandeko ramram sugipa ong'ja. Chipu nokma matchok, balgitchak aro gipin maburungrangkoba minokna man'a. Basakoba basakoba mongma bi'sakoba ua minoka. Man'ode mongmarangba uko cha'na namnikbea. Chipu nokmao bisi dongja. Suode uan suna bilakbegipa ong'a. Rakgipa bolni bigilkoba taprappile suna man'a. Ia noksao matchokko minokna wenjetenggipa chipu nokmako nika. Chipu nokma an'tangni minoknasigipa matburungrangko indaken wenjete nom'atchengronga; aro indake uarangni wenjeton greng aro ja'tengrang bineksranga. Ka'donggipa

manderangde chipu nokmako den'ronga, aro uko
den'na mamungba kenani gri; maina mande una
boltongko on'ode ua an'tangni skoko uno gata.



Chipu Nokma

Chipu nokmana bate chipu chongiparangan man-
derangna kengni ong'bata, uarang maina bisigrak
ong'bata aro manderangko sue nisibata. Pilakna
bate chipugamo bisi bang'bata, aro uni suo mande-
rang sirongbata.

Lesson 16

Peru Raja

Changsao peru mangsa an'tangko pilak matburungrangni raja ine mingsingataha. Aro an-



tangko raja ong'na krara ine ma'manti kamrangchi mesokaha. Uni gimin matcha, mongma, mapbil, singho aro pilak matburungrangan raja ine uko olakitokaha. Indiba salsao uan pilak gipin matburungrangni raja ine olakiako man'mitingo, burungo adita peruskarangni mikoako knae guale mikoatpamanaha. Unon pilak matburungrang uko ramram perusan ine u'iaha aro untalan uko olakijaha aro uko raja ine manijaha.

Saoba saoba an'tangtangani ong'a, chong'motna bate nambatgipa ong'a ine mesoka, indiba maiba maiba kamrangchi uamang'ni ong'a chong'motko u'ina man'aia.

Lesson 17



Do'kru

Do'krurang nina nitobea, aro uarangni mikoa knatobea. Basakoba uarangni mikoachi maiba chanchianiko naata; maina uarangni mikoara adita sinteani gnangako mesoka. Skango mechik bi'sa saksu ma'gipani duk on'beani gimin nokoni kate do'kru pilaha, aro untaltal ua salo ong'a kamkon mingi sintee mikoronga ine A'chikrang aganronga.

Lesson 18

Do'de

Ian do'de bipa ong'a. Uni ki'me ro'a aro nina nitoa. Do'de bipa uni ki'meko badale chroka. Chrokmitingo uko time rim'na ba dokna man'a; maina uan chrokmitingo ki'meko badale chrokani gimin uni mikkangchina agre gipinrangchiniko mamungkoba niksona man'ja. Uni mitimko manderang samna jakkala. Uni ki'meko gijip daka, aro uni grangko leka sena kolom dake jakkala.

Lesson 19

Pagipa, Degipa aro Gada

Changsao paningsa sakgni gada mangsako palna ine antiona moe re'angaha. Re'angon re'angon

ramadilo mande saksako grongaha. Ua mande aganaha, 'Na'simang gisik gri. Gadako indin re'na on'e an'tangtangde ja'achi re'e duk man'a.' Ia katako knae budepa an'tang depanteko gadani kosako gakatatemung an'tanga ja'man ja'man re'angaha.

Re'angon re'angon mande saksako grongtaiaha. Uaba depanteko aganjok, 'Na'a an'tang gadani kosako gakate re'e, an'tangni paa budepakode ja'achi re'ata iara namama?' Indinako knaemung budepa kratcha'e, an'tangan gadani kosako gakate depanteko ja'achi re'ataha. Indake re'angon re'angon gipin mande saksako grongtaijok. Uaba budepako aganaha, 'Na'a an'tang gadani kosako re'e, nang'ni depantekode ja'achi re'atna namnikama? Nang'ni depantena na'a ka'sajama?'

Ia katako knaemung, an'tang depantekoba gadani kosako gakatatemung re'angjok. Uandake re'angon re'angon gipin mande saksako grongtaioa uaba aganaha, 'O budepa, ua gadara na'simangnima?' Budepa aganaha, 'Oe ia gada chingnin.' Unon ua aganaha, 'Gadara chona, na'simangni be'en jrima. Uni gimin uara na'simangko re'bitna amgenma?' Na'simangba gadako ripee niboching, uan jrimama jrimja?'

Ia katako knaemung paningsaan gadani janggiloni ong'onaha. Unikoa uamang gadani ja'teng sambrio kae ripee jal-angko malangaha. Unon manderang uamang'ko ka'dingstekaha.

Uni gimin uamang kratcha'e gadako galonate nokchi re'angpilaha. Unon aganaha, 'Himangai! darang mandeni katako ra'e kam ka'ara gadasa sie gimaiaha.' Indake uamang namen duk ong'aha. Uandake gisiktangchi kam ka'gija gipin mande-rangni katako ra'e kam ka'ara choljokgijani ong'a.

Lesson 20

Mongma

An'chingni a'songo mongma bang'a. An'ching uarangko nikronga. Ua dal'gipa matburung ong'a.



Uo sundul donga. Uachin ua bolko pangpikna man'a aro chonchongipa bosturangko kolna man'a. Uni mikron chona. Uo wagam ponggni donga. Mongmani wagam gamchatbea. Mongma bilakbegipa ong'a.


Manderang mongmarangko rim'e jilode uarang mikmala. Manderang uarangko gakate re'na, sikar ka'na aro bosturangko gate ra'na jakkala. Iarangna agreba manderang maiba maiba jringipa kamrangko mongmarangko ka'ata. Momngma nokgipana ka'sana u'ia.

Lesson 21

Chupegkipa

1. Chupegkipa tangkako name jakkalja.
2. Uko altuae togina man'a. Chuni a'sel uni gnangrang cham'a bon'a.
3. Bilagkipa mandeba chupegkode bilakja.
4. Ua mandeskako aro rakgipa, dal'gipa mandekoba mande mingja.
5. Mitam manderang chu ringani a'sel gro nanga, cha'na ringna chu'ongja aro kangal onga.
6. Ua ramao gitila, je biapoba saksan tusia aro gro man'raka.
7. Chupegkipa mandeni be'en an'sengrongja.

Lesson 22



Te'gatchu

Te'gatchu bol gipin bolrang gita a'a jeja. Jeo ge'oba ua tangaia, indiba ua a'a chijimgipao nam-bata. A'a chijimgipao chagipa bol tangsima, aro bite nangbea. Uni biterangba dal'dala, indiba mesenga aro jo'ong cha'bea. An'chengchi pak-magipa a'ao chagipa bol chona aro silja. Uni biterangba chonchona aro nambreja. A'sal gnang-gipa a'ao chagipa bol silbata aro uni biterangba cha'na tobata.

Maldah aro Bombayni te'gatchurang cha'na toa. Uarangko chi'beani gimin mingsinga. Kolom

dake ge'gipa bol bitchrioni chagipa bolna bate nambata aro dal'bata. Bitchrioni chagipa bolrang bilsu bonga ba bilsu dokosa bite nangchenga, aro uarang bilsu ru'ute tanga. Kolom dake ge'gipa bol dal'dalbatgipa biterangko nangna man'na gita balchengani bilsio uni bibalrangko ake galtokode nama.

A'kol tu'e cho'enba a'ki baksa a'salko brine ge'ode bol dal'ningbata. Uarangni ja'dilrang aro cheksirang peng'patgrike pangsa panggipinni dal'gniko champengna man'jana gita te'gatchu bisarangko mik kolgrik ba mik kolgrik bonga chel'grike ge'na nanga.

Ja'pango burung dikpripode, ong'jaoba uno jabol bang'beode, bol silja aro bite nangbreja. Ua bite nangoba uni biterang chonchona. Ja'pangko badita taria inditan biterangba dal'dala, namnama aro chi'a.

Lesson 23

An'chik a'songoba narangrang bang'a. Uarangko mitamrang amrik minga aro mitamrang tetol minga. Indiba da'ororo Achikrang uko komila lebu mingbata. Khasi aro Jaintia Hillsni narangrang nama. Maina uarangni bigil ba'a aro simila, cha'oba uarang chi'a aro su'ua. Uarangni be'enni birimantion bitchi gapa. Rong'chun aro rong'rik-kak a'ste gnanggipa a'ao aro mikka waronggipa

biaprango narang silbata. June jaoni September jaona kingking narangrangko ge'ani nambatgipa somoe ong'a. Uko ge'nasion mik gni ba mik gitam apale aro mik samang tu'e a'kolko cho'chengna



Narang

nanga. Unikoa do'bok ba mes ki'ini a'sal aro grengrangko dane a'kolko dappilenba uno ge'na nama. Ja'pango grengrangko donode bol silbata, aro uni biteba chi'bata. Bijakko jo'ong cha'baengode. Tarpin (Turpentine) toko pilakon satkikidapna nanga. Unon pilak jo'ongrang kata. September jao boloni mik gni apale ja'pangko cho'wilwile, sal chi'bongana kingking, pilak ja'dil su'bragiparangko naate donna nanga. Sal childoko do'bok ki'i, natok soa, na'kam aro grengrangko a'a baksa brine dappile donna nanga. Bite nangkario antiprak changprak chi rurongna nanga. Narang bitchrioniko ge'ana bate bol namaoniko kolom dake ge'an nambata. Maina basakoba basakoba bitchrioni chagipa bolrang namja, aro uni biterangba dingtang ong'a. June aro August jarango kolom ratna man'ode nambata.

Lesson 24




Mapbil

An'chingni a'songo mapbil jat gni donga. Ua-rang mapbilwak aro mapbil sarang ong'a. Map-bilwakara wak gita dakanga. Uan gisima aro jat gnini gisepo dal'bata aro uni ka'bako ontisa gipok-aŕa donga. Mapbil sarangara gitchakmranga aro uni ka'bako gipoka dongja. Ia jat gnini gisep-o mapbil sarangan ka'namjabatgipa ong'a. Mitam manderang matchana bate mapbilnan kenbata. Matcha mandeko chikode ua uko si-srange chika, indiba mapbil mandeko chikode ua uni mikkang bimangkosa ong'siate donangrong-bata; maina ua mandeko chikon uni sko aro mik-kangkosa chikrôngbata. Mapbilrang manderangni a'baoni me'rakkü aro te'eko cha'e rusirongbata.

Lesson 25

Katsusaa

Bi'sarang katsusae rona namnika. Katsusarong-
ani be'enko adita ranta ka'ani aro bilakatni ong'a.



Basakoba basakoba maniani aro susaani salrango
manderangko katsusaatranga aro amgiparangoni
sak gni ba sak gittamna boksirangko on'ronga.

Ia noksao an'ching adita bi'sarangni katsusaeng-
ako aro uamang'ni giseponi saksani nisanona
soknasiengako nika.

Lesson 26

An'tale Dongani

Be'eno an'chinek nangoda an'chingni be'enrang seenga aro an'sengna man'ja. Auode be'enni moclarang tala. Uni gimin an'ching pangnan aue an'tangtangni be'enrangko rongtale rakina nanga. An'ching an'chingni ba'rarangkoba pangnan su'e rongtale rakina nanga; maina ba'rarangko pangnan su'e rongtale rakijaode uarangba seenga aro an'chingko saata.

An'ching ja'skil jakskilrangkoba pangnan rate rongtale rakina nanga. An'ching jakskilrangko ratrongna simsakjaode uarango moclarang gisime skonge donga aro uarangko an'ching cha'anirangko cha'ao cha'chapmanode an'ching ma'manti saanirangko man'na ama. Pringanti an'ching miksuna aro wagam natnaba gualna nangja.

Lesson 27

Zelly aro Nonee

Zelly: Sari, nibo da'o sal ka'sinangengaha. Hai, an'ching a'bachì rona aro rimitchipchip nito-gipa a'barangko nie katchana. Atamo an'ching adita bibalrangko ra'e re'bapilna.

Nonee: Inghing, anga nang baksa da'o rona man'jawa; sal salniangengaha. Adita ja'mano skulni somoe ong'ginok. Uni gimin kratcha'ako man'jana gita, anga an'tang lessonrangko tarisona nanga.

Zelly: Sal sal maina skulchi re'a aro maina kratcha'ako man'a?

Nonee: Knabo, sari, anga skulni katako nang'na adita agangen. Sagipa kontako dokon bi'sarang pilakan skulona soktokna nanga. Gnigipa kontako dokan baksa skigipa re'bae skulona napa. Unon pilak bi'sarangan rang'san chadenge skigipako salam ka'a. Unikoa tom'tom asongtokchina skigipa bi'sarangko geeta aro bi'sarang pilakan skulona re'batokama re'batokja uko u'ina bi'sa sakantini bimungkon minge okama. Uni ja'mano skigipa classrangko ra'a. Basakoba basakobade lesson-tangtangna simsakgijagipa bi'sarang sastiko man'a. Class ra'e matchotahaon bi'sarang an'tangtangni slate, pencil aro pilak ki'taprangko tarie mikkang-

tangtango dona aro skigipani chadengna ge'eton bi'sarang pilakan chadenga. Skul watnasion bi'sarang pilakan skuloni riting riting dake noktang-tongchina re'ongkata.

Zelly: Indide anga basakoba nang baksa skulchi re'e nigen.

Nonee: Re'e nipabo sari, anga kusi ong'begen; skigipaba namnikbegen. Aiao! anga konta doka gita sring sring knaenga. Renahane, sari dongbone.

Indine Nonee saritang Zellyko wate skulchina re'angaha, maina ua namgipa aro bimchipgipa bi'sa ong'achim.

GARO READER I

Published by

TURA BOOK ROOM

TURA - 794001 WEST GARO HILLS